



San Murezzan Bagn enturn il 1900.



Vista actuala dal vitg da San Murezzan.

# Svilup istoric da la vischnanca da San Murezzan

Cultura da bogns, grandhotels luxurius e center da sport

■ **San Murezzan furma ina vischnanca politica situada en il circul Engiadin'Öta, district Malögia. La vischnanca consista da las duas parts Vschinauncha (1830 m) e Bagn (1775 m) e cumpiglia la fracziun da Champfèr (1825 m) ed il quartier da villas Suvretta. Lieu da cura nobel e center da sport a la riva dal lai cun il medem num. 1137/39 ad sanctum Mauricium (copia), tudestg St. Moritz (uffizial). 1803 183 abitants; 1850 228; 1900 1603; 1910 3197; 1950 2558; 1970 5699; 2000 5589.**

## Temp preroman

Il 1853 han ins scuvert durant lavurs da construcziun a San Murezzan Bagn in enchaschament d'aua da funtauna (funtauna da Mauritius), mess a la glisch definitivamain en occasiun dal nov enchaschament da la funtauna il 1907. En la profunditad da 1,4 m èn ins urtà sin dus bischens da lain da laresch, installads en posiziun verticala. Ils bischens avevan in diameter da var 0,8–1,4 m ed in autezza da var 1,8–2,3 m ed eran per part emplenids cun belma. Els eran enramads da duas chaschas da lain rectangularas u trapezoidas. La chascha exteriura era vegnida realisada cun laina runda (construcziun da bloc), quella interiura cun laina squadrada enchaschada (aisas). Il lain bain mantegnì mussava numerus fastizs da l'elavuraziun. In dals bischens cunteneva divers objects da bronz, tranter auter duas spadas cun manetscha entira, in fragment d'ina loma da spada, ina loma da stilet ed ina gluva da decoraziun. Ils chats dateschan per part anc dal temp da bronz

mesaun (ca. 15avel–14avel tschientaner a.C.), per part dentant gia da l'entschatta dal temp da bronz tardiv (ca. 13avel–12avel tschientaner a.C.). Ils objects eran plazzads cun premura en il bischen da lain ed eran probablamain in'unfrenda ad in dieu da la funtauna. Tenor retschertgas dendrochronologicas pli recentas è vegnida enchaschada la funtauna cun gronda probabilitad il 1466 a.C. *Jürg Rageth*

## Dal temp roman fin l'entschatta dal 21avel tschientaner

Cumbain ch'ins aveva percurrì l'Engiadin'Öta en il temp roman, mancan per San Murezzan chats da quell'epoca. En il 9avel tschientaner è vegnida administrada l'Engiadin'Öta, sco feud imperial, d'in tschert Richpert; pli tard è San Murezzan passà als conts da Gamertingen ch'han alura vendì il 1137 ed il 1139 lur possess tranter S-chanf e Champfèr (che cumpigliava era San Murezzan) a l'vestg da Cuira. Enturn il 1300 na cumpara San Murezzan anc betg sco culegna. Attestà èn mo singuls bains sparagliads enturn la baselgia da Mauritius. En il temp medieval tardiv fascheva San Murezzan part dal vischinadi da la vallada e da la dretgira auta d'Engiadin'Öta, cun la quala San Murezzan è s'uni a la Lia da la Chadé il 1367. Il 1462 è vegnida dividida la dretgira auta d'Engiadin'Öta en las duas mesas dretgiras da Suot e da Sur Funtauna Merla, da la quala San Murezzan è daventà in vischinadi. En occasiun da la partiziun territoriala da l'Engiadin'Öta (1536–38) ha San Murezzan obtegnì in agen territori communal. Ils dretgs d'utili-

saenziun da las alps, da las pastgiras e dals guauds èn passads dal vischinadi da la vallada als novs vischinadis formads da vitgs e vischnancas da quella.

La baselgia da S. Mauritius era, sper quella da S. Luzi a Zuoz e da S. Peter a Samedan, ina da las trais baselgias principals da la val. Sia plaiv cumpigliava la part sura da la vallada da San Murezzan fin a Segl, cun las vals laterals Fex e Grevasalvas (Segl). Da la baselgia da S. Mauritius existia mo pli il clutger romanic inclinà (teren da bovas). Il 1577 ha adoptà San Murezzan sco ina da las davosas vischnancas da l'Engiadina la cretta reformada. Il 1787 è vegnida erigida en vischnanca la baselgia reformada, il 1897 il clutger neogotic. Il 1867 han ins construi la baselgia parochiala catolica deditgada a s. Mauritius, il 1889 a San Murezzan Bagn la baselgia catolica consecrada a s. Carlo Borromeo, il 1871 quella englaisa ed il 1877 la baselgia franzosa.

Il 1537 ha menziunà Paracelsus per l'emprima giada ina funtauna curativa (aua forta) a San Murezzan. Dapi alura èn cumparadas nundumbraivlas descripcziuns medicinalas e geograficas da la funtauna ascha. L'emprima analisa chemicca da quella datecha dal 1674. En il 17avel e 18avel tschientaner vegniva ella frequentada oravant tut da curants talians (il duca da Parma e Savoia e.a.). In'emprima chasa da cura è vegnida averta il 1832 (anc senza ustaria, agiuntada pir il 1856). La chasa da cura, realisada il 1864 tenor ils plans da Felix Wilhelm Kubly, ha inizià il svilup da San Murezzan sco center da cura da bogns. La funtauna da Mauritius è vegnida encha-

schada da nov en ils onns 1853, 1907 e 1937, quella da Paracelsus il 1853. Il nov center da bogns da cura è vegnì terminà il 1976. Enturn il 1850 ha avert Johannes Badrutt en la part sura da la vischnanca l'Hotel Engadiner Kulm ch'è daventà in dals emprims hotels da luxus, muni il 1879 cun l'emprim indriz idraulic stabel per l'illuminaziun electrica da la Svizra. Dapi il 1875 èn vegnids erigids, l'emprim a San Murezzan Bagn, alura era en il vitg ed a Suvretta, grandhotels luxurius sco era numerus hotels pli pitschens e pensiuns. Dal 1870 fin a l'Emprima Guerra mundiala è sa transformà San Murezzan ad ina «citad en las autas muntognas» (lescha da construcziun dal 1906). En ils onns 1880 han importà giasts englais sports d'enviern sco il curling, il skeleton ed il bobsleigh (bobera natirala dapi il 1890). Alura è sa sviluppà il sport da skis a San Murezzan ch'ha organisà ils gieus olimpics d'enviern dal 1928 e dal 1948. Numerus hotels, naschids durant la Belle Epoque, han però subi grondas perditas suenter l'Emprima Guerra mundiala; insaquant èn restads serrads per plirs onns. En ils onns 1920 ha l'economia cumenzà a sa restabilir, ma la crisa economica mundiala e la Segunda Guerra mundiala han puspè franà il svilup. L'expansiun turistica, iniziada en ils onns 1950, ha provocà in boom da construcziun. L'impurtanza da la parahotellaria è creschida. Il 2004 disponiva San Murezzan da 5642 letgs en l'hotellaria, da 3500 letgs en la parahotellaria e da 4000 en secundas abitaziuns. Per l'onn turistic 2008–09 èn vegnidas registradas 864 310 pernottaziuns, 791 355 da quella en hotels e stabiliments da cura, il rest en la parahotellaria. Numerus attracziuns sco cursas da chavals sin il Lai da San Murezzan cuvert da glatsch e naviv (dapi il 1907) contribueschan al renum dal lieu. Ultra da quai dispona San Murezzan dapi il 1976 d'in center da trenament en autezzas. Il 1906 è vegnì avert il Museum Engiadinais, il 1908 il Museum Sgantini. Dapi il 1904 furma San Murezzan la staziun finala da la Viafier retica, dapi il 1910 è la vischnanca colliada cun la Viafier dal Bernina. Tranter il 1896 ed il 1932 circulava in tram electric a San Murezzan. La vischnanca dispona era da numerus telefericas, sutgeras e runals. Las funicularas San Murezzan-Chantarella (1912) e Chantarella-Corviglia (1928) e las pendicularas San Murezzan Bagn-Signal e Corviglia-Piz Nair rendan accessibel ina da las pli vastas regiuns da skis e da viandar da l'Engiadina. San Murezzan è, sper Samedan, in dals centers da servetschs da l'Engiadin'Öta. Il 2005 purscheva il sectur terziar 78% da las plazzas da lavur en la vischnanca. A partir da la segunda mesadad dal 19avel tschientaner è San Murezzan, oriundamain da lingua rumantscha (1880 50,2%), vegnì quasi totalmain germanisà. Il 2000 eran 67%

dals abitants da San Murezzan da lingua tudestga, 4,7% / 12,8% (meglra lingua / tuttas indicaziuns) da lingua rumantscha.

*Ottavio Clavuto*

## Champfèr

Abitadi sin territori da las vischnancas politicas da San Murezzan e Silvaplauna, situà a 1825 m a la via veglia al nordost dal Lej da Champfèr dad omaduas varts da l'Ova da Suvretta che furma il cunfin tranter San Murezzan e Silvaplauna. 1139 *Campofare*, tudestg *Campfer* (antiqua). 1900 124 abitants; 2000 462. En il temp medieval apparteneva Champfèr ecclesiasticamain a la plaiv da San Murezzan, dapi la reformaziun (1552) a Silvaplauna. Construcziun da la baselgia da S. Roc 1521. Via d'access a San Murezzan Bagn dapi il 1866. Plirs hotels dapi la fin dal 19avel tschientaner, grond augment d'abitaziuns da vacanzas a partir dal 1960. Atgna scola primara (5. e 6. classa).

*Silvio Margadant*


## Johannes Badrutt

\* 2 d'avrigl 1819 a Samedan, † 1 da november 1889 a San Murezzan, reformà, da Pagig. Figl da Johannes, impressari e commerziant da ferramenta. ∞ Maria nata Berry, da Cuira, sora da Peter Robert Berry, medi da cura a San Murezzan. Suenter l'emprendissadi a Cuira e Clavenna ha Badrutt lavurà en l'interpresa dal bab ed ha manà l'Hotel A la vue du Bernina a Samedan. Fittanza (1855) ed acquist (1858) da la pensiun Faller a San Murezzan. Badrutt ha transformà questa pensiun sut il num Hotel-Pension Engadiner Kulm en in dals hotels da luxus ils pli impurtants da la Svizra ed ha mess, tras in acquist da terren planisà, la basa per in vair imperi d'hotels da sia famiglia a San Murezzan. Il 1882 era Badrutt il segund grond possessur da terren dal lieu. Il 1878/79 ha el laschà installar en l'Engadiner Kulm l'emprim implant da glisch electrica da la Svizra. Giasts britannics han contribuì considerablamain a la fluriziun da ses hotel e dal lieu da sport San Murezzan ed han introducì là il tennis, il curling, il bobsleigh, il skeleton ed il golf. Il self-made man Badrutt è era daventà enconuscent sco collectader d'art e benefactor.

*Silvio Margadant*

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.



Mesa statua da Johannes Badrutt a San Murezzan.